



Inatsisartuni ilaasortaq Justus Hansen
maani

Inatsisartut Suleriaasianni § 37 naapertorlugu Naalakkersuisunut apeqqummut akissut

Matumuuna § 37 naapertorlugu apeqqummut akissut nassiunneqarpoq:

- 1) Naalakkersuisut Tasiilami ikualaaviliornissartik pilersaarutigaat?
 - a) Taamaappat, qaqugu sananeqassava?
 - b) Taamaanngippat, Tasiilami eqqagalerinermut tunngatillugu Naalaakersuisut sunik pilersaaruteqarpat?
- 2) Sooruna Tasiilami ikualaaviliornissamut aningaasaliissutit Aningaasanut Inatsimmiit peerneqarsimasut?

Ilisimatitsissutigineqarsinnaavoq taamanikkut Naalakkersuisut 2008-p naanerani aalajangersimammata Tasiilami ikualaavissamut aningaasaliissutit Nunatta Karsianut utertinneqarpata naleqqunnerpaajussasoq. Tamatumunnga pissutaasimavoq aningaasat Sanaartornermut Iluarsaassinermullu Aningaasaateqarfimmi ukiorpassuarni attorneqarnatik uninngaannarsimaneri. Tasiilami ikualaavissamut aningaasaliissutit siullit taamaalillutik ukioq 2000-mi aningaasaliissutigineqarsimangaluarput.

Avatangiisinut peqqinnissamullu isumannaatsumik ullutsinnut naleqquttumik eqqagassanik passussinissaq qulakkeerniarlugu annertuumik pisariaqartitsisoqartoq Naalakkersuisut isumaqataapput. Eqqagassat pillugit iliuusissatut pilersaarummi Naalakkersuisunit akuerineqarsimasumi siunniunneqarpoq nunarput tamaat ataatsimut isigalugu ullutsinnut naleqquttumik ikualaavinnik pilersitsisoqassasoq, taamaalilluni ammasumik ikuallaasarneq unitsinneqarluni. Tamatuma saniatigut eqqakkanik ulorianartunik allanillu eqqakkanik ajornartorsiutaasunik tigooraavimmik aamma pilersitsisoqassaaq.

Eqqakkanut tunngasunut akisussaaffik Namminersorlutik Oqartussat aamma kommunit akornanni avinneqarsimavoq. Eqqakkanik passussinermut igitsinermullu kommuni akisussaavoq, inatsisillu pisariaqartinneqartut qularnaarnissaannut Namminersorlutik Oqartussat qitiusumik oqartussaallutik.

Eqqagassat pillugit iliuusissatut pilersaarutip Naalakkersuisunit juni 2010-mi akuersinerata peqatigisaanik Naalakkersuisut aamma aalajangerput ullutsinnut naleqquttumik ikualaavinnik pilersitsinermut aningaasartuutit atuisut akiliuteqartarnerisigut akilerneqassasut. Inatsisit naapertorlugit taamaalilluni Tasiilami ikualaavimmik pilersitsinermut aningaasartuutiit akiliuteqartitsinikkut aningaasalersornissaannut kommuni taamaalilluni periarfissaqarpoq. Akiliuteqartitsinikkut aningaasalersuineq taamaalilluni "mingutsitsisup akiliisarnissaanik tunngavimmu" naapertuuppoq.

12. april 2010

Postboks 1614
3900 Nuuk
Tlf. (+299) 34 50 00
Fax (+299) 32 52 86
E-mail: nnpn@gh.gl
www.nanoq.gl

Eqqakkat assartornerinut aamma eqqakkanut ulorianartunut eqqakkanullu ajornartorsiutaasunut allanut tigooraavinnik pilersitsinermut tunngatillugu misiligutaasumik piler-saarutitut taamatut ittunut ilaannakuusumik aningaasalersorneqarnissaannut kommunit qinnuteqarfigisinnaasaannut, 2011-mi ukiunilu missingersuusiorfiusuni Naalakkersuisut aningaasanik immikkoortitsipput.

Aammattaaq siunissami nuna tamakkerlugu eqqakkanik ikullaasarfinnik aaqqiisutaasussanik qulaajaaneq maannakkut ingerlanneqarpoq aamma aningaasalersuisinnaanermut periarfissat ilanngullugit.

Naggasiullugu ilisimatitsissutigineqassaaq ullutsinnut naleqquttumik eqqakkanik passusinerup qulakkeerneqarnissaanut tunngatillugu Nunamut Namminermut, Pinngortitamut Avatangiisinullu Naalakkersuisoqarfiup KANUKOKA kommunillu ataasiakkaat akornanni oqaloqatiginnerit ingerlanneqarmata.

Inussiarnersumik inuulluaqqusillunga

Anthon Frederiksen